

卷十三

書名 富順縣志三十八卷 道光七年刊本
 撰者 清 張利貞等 修, 清 黃靖圖等 纂
 卷 卷十三
 內容分類 史-地理-今地志-四川
 索書號 史部-地理-都郡-237
 編號 B2662000

富順縣志卷之一

星野志

萬物之精上為列星在天成象在地成形天有分星地有分
 野二十八宿周天之下合蜀於秦井鬼同辰入參三度介巴
 與蜀爰攷天文志為首錄志星野第一

[彩色首頁1](#)

[東洋文化研究所漢籍目錄 編號: B2662000](#)

[東洋文化研究所漢籍目錄所藏漢籍善本文影像資料庫 索書號: 史部-地理-都郡-237](#)

[漢籍善本文全文影像資料庫文本富順縣志三十八卷 道光七年刊本](#)

[版權所有: 東京大學 東洋文化研究所](#)

[使用上的注意事項](#)

富順縣志

卷之一

星野

所究研京東院學化文方東

No. 804







學

風

圖





富順縣志卷十三

學校志

學校之設所以明倫遂生復性治理相因富稱巨邑輩出才人經綸大用文教日新君臣有義父子有親大節斯立共沐

皇仁志學校第十三

書院義學附

文廟大殿五楹中奉

至聖先師孔子以復聖顏子宗聖曾子述聖子思子亞聖孟子配
享以先賢閔子冉子冉子宰子端木子冉子仲子言子卜子
顓孫子有子宋朱子從祀

東廡以

先賢蘧子瑗澹臺子滅明原子憲南宮子适商子瞿漆雕子
開司馬子耕梁子鱣冉子孺伯子虔冉子季漆雕子徒父漆
雕子哆公西子赤任子不齊公良子儒公肩子定鄒子單罕
父子黑榮子旂左人子郢鄭子國原子亢廉子潔叔仲子會
公西子輿如邾子巽陳子亢琴子牢步叔子乘秦子非顏子
噲顏子何縣子亶樂正子克萬子章周子敦頤程子灝
邵子雍先儒公羊高伏勝董仲舒后蒼杜子春諸葛亮王通
陸贄范仲淹歐陽修楊時羅從彥李侗呂祖謙蔡沈陳淳魏

了翁王柏趙復許謙吳澄胡居仁王守仁羅欽順黃道周湯
斌六十五人從祀

西廡以

先賢林子放宓子不齊公冶子長公皙子哀高子柴樊子須
商子澤巫馬子施顏子辛曹子卣公孫子龍秦子商顏子高
壤駟子赤石作子蜀公夏子首后子處奚容子蒧顏子祖句
井子彊秦子祖縣子成公祖子句茲燕子伋樂子欬狄子黑乳
子忠公西子蒧顏子之僕施子之常申子棖左邱子明秦子
冉牧子皮公都子公孫子丑張子載程子頤穀梁赤先儒高

堂生孔安國毛萇鄭氏元范甯韓愈胡瑗司馬光尹焞胡安

國張栻陸九淵黃幹真德秀何基陳澔金履祥許衡薛瑄陳

獻章蔡清呂坤劉宗周陸隴其六十三人從祀

崇聖祠在 聖廟後內奉肇聖王木金父公 裕聖王祈父公

詒聖王防叔公 昌聖王伯夏公 啟聖王叔梁公以先賢

顏氏曾氏孔氏孟孫氏配先儒周輔成程昞張迪朱松蔡元

定從祀

東名宦祠祀

漢張翼

宋張宗誨 周延儒 程驥 楊騫 王純仁 黃裳

虞夷簡 趙希益 家炎

明四川巡撫曾省吾

國朝四川總督李國英 四川巡撫杭 愛 敘州知府顏 敷

鎮南將軍莽依圖 工部尚書湯 斌 吏部尚書徐 潮

振武將軍佛尼勒 監察御史陸隴其 太子太保福 善

太子太傅魏裔介 太子太傅馬 漢 漢軍都統馮國相

知府 趙隆美 布政使司郎廷相 按察僉事周 燦

御史 高起龍 御史 噶爾圖 光祿大夫朱馬喇

光祿大夫伊馬喇 副都御史姚締虞 給事中錢紹隆

按察使司劉德芳 閩浙總督前四川布政使司董教增共三十四人

西鄉賢祠祀

監察御史郭廉 布政使司甘敬修 按察僉事范宏毅

教諭 郭維新 監察御史范珠 布政使司周載

按察副使劉用中 知州 熊載 稽勲主事朱寅

知府 周詔 工部尚書甘為霖 禮部郎中熊過

侍讀學士陳進之 按察副使唐曜 戶部郎中周鍵

監察御史熊迴 參政 范懋和 督學 宋豫卿

按察副使唐可封 布政使司劉之龍 按察副使朱莒

給事中 錢夢臯 御史 楊大烈 兵部侍郎楊述中

兵部侍郎劉時俊 兵部侍郎楊述程 監察御史聶紹昌

按察副使楊世賞 按察副使唐登儁 兵部尚書范鑛

按察副使熊江 尙寶司丞聶繩昌 給事中 劉堯珍

知縣 錢生輝 貢生 羅之會 庠生 向玉階

共三十六人

廟前為月臺中為甬道東西為石階南為戟門又南為泮池
又南為靈星門左禮門右義路照牆一座照牆外有下馬碑

文廟在縣治東南宋高宗紹興中知監蒲津闕修理宗寶慶中知監趙希益重修元武宗至大四年知州任顯忠葢補大成殿建立戟門修置禮器邊豆等壬子又修兩廡三門英宗至治元年縣佐王納速建御書碑亭植兩廡欄楯構講堂

訓導趙祖全記校庠序鄉學也國學則三代無異名記曰凡學春官釋奠於其先師至漢儒始有先聖先師之祀然漢之學校郡縣雖設而孔子之廟不出闕里明帝始詔郡縣祀孔子於學而廟制未之見也唐興始命國子監立孔子廟貞觀詔天下州縣皆立孔子廟蓋三代以上聖賢迭興道明教立周衰聖王不

作皇極墜地吾夫子祖述堯舜憲章文武植萬世之綱常立百王之大法使天下後世復知有君臣父子夫婦長幼朋友之道其功更有賢於堯舜宜世世崇德報功焉元自至元辛卯郡守奉直大夫蒲善繼構正殿至大辛亥武畧將軍任顯忠謂學校風化所基之地政治所出之原而正殿滲漏禮器不修戟門未建講堂尙虛遂計材鼎新塗葢計置邊豆壘爵一百餘又明年而修兩廡三門於春乃曰農事方興餘且後議尙存羸鏹以爲彩繪從祀之資至治元年縣佐王納速歹實來判是郡追美兩侯建御書之碑亭刻褒封之詔旨植欄於兩廡構講堂於舊基

猗歟三君之於廟學也可謂盡心焉耳矣大抵風俗由學校之興廢學校興廢由守令之賢否歷遇賢牧前規後隨士不覺費民不覺勞而廟學遂成士當思古人設爲庠序學校者何意聖人垂世立教者何道朝廷今日崇獎儒學者何心豈惟經明行修以待聘而化民成俗皆士之分也勉書以記

順帝至正己丑知州李奉元新製禮器配位

趙祖全記廟學圯於泰定乙丑之水泛流湍悍基址崩摧僅存三門至正己丑夏奉元李侯被命守邦專興學校爲先務召集儒家子弟覈實廩餼閱視殿宇門廡器皿供具虧缺按古禮器

圖無銅鑄之儀遂命竹工木工因圖製成竹邊木豆及俎凡二百九十五更造正配位凡五從祀凡十二丹漆之費取贍學田產所出爲鈔一十八錠零二十兩外餘五十六錠零十貫貯爲後興造之用甫畢工而適丁秋祀躬視牲殺器皿盥滌掃除邊豆有楚穀核惟旅率僚屬同寅協恭嚴潔環而觀者罔不咨嗟驚嘆至是秩滿將代莫不願紀其實於堅珉以爲後憲先是朝命以侯知本州事次年春以平涼府同知爲達魯花赤夏以陝西諸道行御史臺掾武侯爲判官皆秦之雍人也端方廉介大畧相似夫侯得監郡賢牧公以正輔之郡判武公以公佐之以

是三年間百廢興六事具天時順百穀成獄無寃囚民無嘆息
上而憲臺舉以爲最下而民庶純被其仁其作成廟學特其一
事耳然必以是爲先務者其於化民成俗豈不謂之知所本哉
愚聞之歐陽子曰古禮今皆廢失州縣幸有社稷釋奠風雷雨
師之祀民猶得以識先王之禮而吏多不習至臨事舉而不中
色不莊使民無瞻仰見者怠焉噫斯弊也久矣今侯大作供具
一新禮器恭行釋奠而莫不瞻仰歐陽子之言豈不驗於今日
乎

至正十一年知州蒲善繼建修大成殿明洪武六年知縣鍾鉉修

廟學壇墀正統八年知縣李真修大成殿及兩廡二十四楹增備
祭器又同教諭曾衡於明倫堂南創建抱廳三間堂之內外皆甃
以石戟門外泮池架石爲梁環以欄楯

主事汪回顯記學校有司之首務富順在唐宋爲縣在元爲州
明復改爲縣而隸於敘舊有廟學在縣治東二百武地位爽塏
規制鴻壯歷歲久而日就敝陋前此爲令者翫愒歲月視官署
爲傳舍正統癸亥關內李真子誠來視篆三日首謁廟學目其
挺者摧覆者缺廉者墮植者仄色者污輒憮然曰是皆有司之
責於是毅然爲已任期年之間剔蠹剷奸百廢肇舉以殿宇邃

深不暇改作則以隆以挺其棟桷之下厭者以鱗以翼其覆瓦之缺壞者兩廡則撤舊圖新東西凡二十四楹丹堊藻繪舉以法復圖從祀於廟兩廡壁位凡一百有九循令典也至若邊豆曩爵供祀之器亦筠之木之陶之罔不畢舉又偕教諭曾衡於明倫堂南創建抱廳三間皆極軒敞堂之內外竝甃以石既完且潔而差等有嚴堂之下有鴈塔肇於宋乾道初字畫漫沒不可辨乃琢石重鐫竝續洪武以來舉人進士名於其上以勵學者公暇督植松柏於神道兩旁又於靈星門內濬池爲泮架石爲梁而環以欄楯凡可以致力於學校者靡不悉心爲之洪惟

我太祖高皇帝奄有四方建學育才列聖相承尤重學校之政皇上嗣大歷服尤拳拳焉是以八十餘年雖遠而海隅僻而山郭莫不父詔其子兄勵其弟咸願服儒衣冠遊庠序沐浴清化爭自激昂以思効用矧富順禮樂文風頡頏鄒魯人才代作濟濟彬彬夔出兩川之右又得賢令祇順德意撫治而作興之無負百里之寄也游於學者當何如於是考其德行道藝之懿蹈其務本爲己之實上義而下利崇實而黜華無躐等凌節無忽近慕遠則於聖人垂世立教之意朝廷建學育才之恩爲少副矣若羣居但爲決科媒祿之計習爲言語文辭之工則非予之

所望也茲因請記姑述梗槩如右庶司政教與學於是者有所警云

宣德七年縣丞李孟謙重建明倫堂天順三年知縣孫瑠復修大成殿及兩廡戟門靈星門明倫堂會饌廳

知縣孫瑠記建學立師國家爲治道計也四川富順縣儒學自洪武迄今幾及百禩廟宇傾頽神像剝落前後俸位於縣者不知更歷幾人率皆視爲傳舍而不加意景泰間關內李真來合茲邑知學校有司之首務廢墜之不可以不修舉由是預礪貞珉創以雄文爲修學之記蓋深注意於此矣而工料則纖毫未

之有也後以九年榮滿畢竟弗果天順紀元予以不才來知縣事生員陳表等累以文廟傾頽不足棲神享祀爲言予愧前人之因循慨聖像之剝落也方欲經營以舉其事奈何異途同宦者從而挾主之事將寢適遇侍御王公用憲副高公澄維持其際力勉爲之時邑人熊福能輩慨然捐貲來助興工間橫逆之民又復迭相誣過予則以爲孔子乃萬世師學校實育賢之地我朝列聖相承未嘗不以興學養賢圖治爲重今焉妄人若彼必將有以害吾美事也封章上聞特獲俞允於是運謀卜吉命匠市材工不勞民費由衆出半載之間落成告舉其大成殿視

舊則加以層簷而高廣增三之一兩廡儀門則撤腐換新靈星門則別爲改造明倫堂會饌廳則仍前制而加修葺棟宇楹龕金碧焜耀聖賢之像爲之精神祭享之具爲之壯觀嗚呼吾夫子之道也天地以一元之氣運行於亭毒間品彙萬物故凡得乎天地之氣者莫不生生化化以遂其自形自色之天苟不得夫天地之氣則將萎瘁顛暗矣其能遂其自形自色之天乎吾夫子以仁義禮智信五者之道流傳於天地之間化育萬民故凡遵乎聖人之道者莫不孝弟忠信以遂其安富尊榮之樂苟或背吾夫子之道則是欺世盜名矣其能逃其自暴自棄之責

乎言至此則知聖道之在人蘊之爲德行行之爲事業如鑿地得泉無所往而不在也豈可委之於難名付之於難聞行不著習不察而自外於聖人耶爲吾民而遊於斯覽於斯者必皆觀感嚮慕凌厲振迅力之以躬行實踐以求無愧於吾道然後慶會風雲致身通顯珪璋神化黼黻皇猷是則斯道爲有光而學不徒建矣事竣衆皆請予爲記予故直序其興廢之由併致夫勸勉之意如此而邑中諸君子之姓名則悉著之於碑陰云
成化八年知縣李嵩修學宮泮池有記成化末年知縣梁文修明倫堂展學地十丈造石香爐等

尙書長寧周洪謨記道不外乎五倫而已堯舜禹湯文武以之師天下孔子以之師萬世師天下者必盡人倫之至以建極於上而又設學校庠序之教以明倫於下師萬世者雖不得師天下之任而推明羣聖之道筆之經以詔萬世使師天下者必法之以建極明倫也聖朝列聖相承旣建極以作式又設學以明倫蓋自京畿以達之於塞徼所在郡縣莫不置學四川郡縣學百有三十餘處而人才之多風化之盛未有過於富順者也予嘗參稽宋輿地紀勝寰宇記元大統志諸書以修郡志是以知之迨至國朝士之登甲第以出身爲尙書任侍郎列朝署官藩

郡者咸有其人是雖本於大化陶冶之功要亦有司勸相之力往歲縣尹李君朝用嘗葺廟學合尹梁君光輔以名進士繼之畢其所未畢舊靈星門以石易木舊爵盞以銅易錫展學地若干丈貲費若干百立育才坊立叢桂坊造石香爐凡旣備矣乃來求記於予予惟學制講道有堂肄業有齋會膳有房習射有圃堂之前建大成殿及大成門及左右兩廡塑先聖四配十哲及門弟子歷代名儒像凡百有二十五春秋必祀朔望必謁後進之遊乎此者晨夕密邇宮墻之下恍然如親炙於杏壇之上豈可聚談曠日而已哉必尊師親友卽經以明道而踐之身以

孝其親以敬其長以睦其宗族以信其朋友他日見試於國以之忠君以之庇民以之修政事以之樹聲績則於斯學豈不爲有光乎於戲道若大路然豈難知哉講之明踐之力道在斯矣故因師學之新而推本國家道化之意以爲諸進勗

嘉靖二年知縣周夔建明倫堂鑄立鐘鼓戟門外竝建泮池

瀘州進士曾璵泮池頌泮水頌頌周侯也曷爲頌周侯修泮泮水頌也魯僖修泮詩人實頌之春秋不書重知務也皆有大美存焉以爲疑焉者過也乃嘉靖四年春余鄰邑金川師遣弟子員曹子宗夏楊子良來言於余曰我周侯治邑二年五善克敦

百度允諧有若正田賦革侵牟罷催擾則農頌稽籍伍止牽誣省箕歛則兵頌節興繕示簡樸惡淫巧則工頌平物價戒欺僞察強市則商頌崇靜廉裁冗費杜需求則給徭者頌懲武斷燭蒙蔽則訴訟者頌野無佩犢畝有遺秉外戶不閉則柔伏者頌禮下耆德延訪幽貞庭無私謁則守道者頌男女尙賁乖瀆必刑表正風俗則婚媾者頌胥吏惴惴隸卒木立百里孚動皆在口碑也我師儒不能以縷亦無待於我師儒也惟是興學育才茂功先我師儒晦而不彰其有慝乎始侯至學瞻廟曰棟未橈覆則腐已葺而新登堂曰覆腐已棟且橈撤而新觀士習曰性

近也作而新我侯之功實不可忘邑賢彬彬我師儒未敢干以
頌言懼涉於私爾子修身好古又素知侯以茲所陳取而稱述
子其任哉余曰嗟乎余固得於講聞之餘矣學古而見之行可
以風天下而况吾蜀也乎竊雅頌之遺聲作泮水頌其辭曰言
言泮宮瀟瀟泮水冠衿峩峩多士戾止誰其新之我侯周子誰
其樂之我侯周子泮宮言言泮水瀟瀟冠衿峩峩多士孔淑我
侯新之庶其式穀我侯樂之庶其錫福噲噲斯堂坦坦斯道來
登來游無呼無傲周侯榮之胥誨胥告周侯臨之載色載笑斯
堂噲噲斯道坦坦來登來游無愧無赧周侯營之發號易簡周
侯臨之發慮懇欵肅肅周侯其儀不忒其儀不忒惟士之則克
敬克明而康而色示我周行無反無側周侯肅肅其儀不瀆其
儀不瀆惟士之律既直既温如玉如玉示我周行無回無適周
侯在泮雙旂晶晶既飲旨酒既歌好音誘我小子造我成人顒
顒印印克廣德心周侯在泮六轡耳耳旨酒既芬好音既起嘉
績用成將去其里何以置之廟堂之史嘉靖四年

嘉靖二十四年知縣嚴清修名宦鄉賢祠崇禎十年知縣貢其志
修文廟兩廡及明倫堂文昌閣名宦祠鄉賢祠奎星樓射圃鯉門
泮池龍池

邑司業陳盟記雒源儒學古地與縣治一脈同來其形大都前人紀之詳矣惟是貯山川吞吐之氣而致杰士從中騫翥濱三百年值論秀書升名數輒指不勝屈卽余謏謏詮才自壬戌釋褐後介跡於中得耳而目夫選雋之盛無何逆躡狂蹂凶焰延於黌序睠言顧之圯壤荒唐鞠爲茂草積仍積待積讓積推如是者十六年而極弊難支矣廟貌旣湮賢書間落諸生皆壯士定不自作解嘲語然弟子之病父兄當思所以療之貢侯以達諱其志江夏人也由屏山蒞我土下車視學慨然曰山川之氣萃於學宮恒與諸生身相往來氣疏而不沴則頽濯五官澹漱九竅暢發於諸職百爲皆能蔚其奇予忍視其沉沒不講疏術乎然疏術講而疏具不疋其何以疏於是周匝詳審先區文廟兩廡從後觀明倫堂登文昌閣左顧宦祠竝射圃與鯉門前憐泮水之濁淖索問奎樓之有無何創何興何扶何葺計物料材用確畫在心一日諭弟子員膚敏者八人至公堂語曰頒費鳩匠捐俸設處我爲政其服役奔走周爰執事吾郡隸責也欲使紀綱不落司工輩如等閒直塞傳舍之事當爲推一二鄉紳爾諸生則宜董治匠作夙興夜寐視修學如修爾屋理學如理爾家利於速成勿致久而疲疲而苟且報可也八生唯唯凡旣備

矣季春經始至孟秋告成一引盼而歸然之勢直冲霄漢頓令式靈之鐘鼓生色更有異者堂隅小沼一泓堪沁詩脾相傳應龍會飛處也人多穢之幾等廢潦鳴蛙侯命石欄作衛周遭而甃焉山漏瑩中細來清冷生人肌粟試一凭欄奮然有蛟龍得雨想侯講疏術以振諸生也若此諸生向余請記曰侯之來閱寒暑半耳而城堞繕公賦清市價平保甲舉飛鴻盜社鼠剔况此學宮煥然昔年所謂築室道旁者一旦報績將煩記室乎抑記其事余曰百度咸熙自有主之者課最爲諸君筆實政則亦筆其實政之及諸生者然一實又何不實也予承乏木天每絲

綸代掌一命一誥非從報政冊中某項某事人不如某克如此而得耶皇路清明敢曰僞售而所被之寵亦或十倍其樸者卽就學宮一事告圯幾於禿穎議創竟如塵飯至侯之身乃實有維新之象入目他時報政諸款中其一曰俸若干兩興庠序若干處嗇夫卽欲不題以實不能也然一實又何不實也諸生復揖予曰明德在泮頂茲不朽尤有進焉時艱民困虎視耽耽文不匿矣武請繕而備諸諸生守喙三尺得盡言於侯予曰毋憂也在泮飲酒實基訊馘今學之鬱一疏直令枯心菽苑諸君驥首而抒浩然乎甲兵蘊之詩書折衝伸於俎豆當路者且謂

侯醇悶中何自練此千萬師行將借侯座推轂一席實心所畫自應以疏學宮之氣疏中原數十年待振之氣矣是舉也貢侯主於上措置二百餘金庠師教諭成都朱如寶訓導朱之禎弼焉而鹽廳沈繼周巡師楊楣皆承流宣力之署也督理者鄉紳知州熊喆同知熊牲董治生員熊灃趙延泰張希詠傅廷對劉廷試劉修朱周祚貢生朱無息捐助者貢侯友江夏金陞此特見之俠義也邑中捐助知府邵建封給事錢夢臯侍郎楊述程副使楊世賞參議劉象瑤參政范鑛行人劉鼎知縣周士英貢生錢象璟楊愈盛楊愈昌等例得並書

國朝康熙二十一年知縣錢紹隆修大成殿明倫堂

尙書徐乾學記康熙壬戌之夏鹽官錢子仲扶之令富順也再閱歲矣以重修學宮告竣不遠萬里寓書京邸乞余文爲記余曰吁錢子其思繼文翁而起者乎犍爲之民其鄒魯乎昔者嘗讀漢書居攝之際中外頌莽功德四萬餘人其時超然高蹈者惟梅福逢萌而已而公孫子陽之據蜀若閩中譙鉉梓潼李業爽道任承等皆矚然不滓或之死而不顧是何海內之無人而巴蜀之多士也高祖慢士尙能而天下應之以功名後之以節義文翁之治蜀興起學校力行教化而蜀人亦以鄒魯自居也

今錢子不以其地爲巖險而鄙夷之而且沐浴以詩書之澤焉
江陽之民其庶幾乎雖然蜀自罹張獻忠屠刈以來數千里內
城郭無煙荆棘之所叢狐狸豺虎之所遊富順之學宮其鞠爲
茂草者蓋數十年矣自順治十六年底定尹茲土者數更而未
遑建立乃不十餘年而吳逆之變又作錢子之捧檄而西也其
地尙爲賊據督撫假之羸卒百餘鼓而前始復版焉遺民數十
家而已錢子披榛莽撫創痍招流散重以兵馬之往來兩年間
方噢咻供應之不暇而獨能急所先務如此可嘉也孟子不云
乎菽粟如水火而民焉有不仁者乎文翁治蜀於旣庶且富之
後其化之也猶易錢子保斯土於鋒鏑之餘而欲以絃歌之治
治之豈不難哉夫鑿江溉田李冰之治也吏不至門薛逢之政
也五袴興謠教民醫藥廉叔度周湛之績也皆古之善治蜀者
吾聞江陽之境雖羣山四繞而其土厚以沃中江環之水利可
與其土靜其民樸而少訟錢子將以文翁之化化之是必先合
李冰諸人之治以治之可知也越明歲余且引領以聽富順令
之報政焉於其請也書以貽之

知縣錢紹隆記自昔三代之隆其人材出而爲國家之用者無
一不本於學故無論辟雍頽宮在天子諸侯之國者有學而術

亦有序黨亦有庠卽下而閭巷亦必有塾凡以彝倫忠孝之大居官蒞民之方靡不講求服習而始克臻於化民成俗之效其道必由乎此也考之王制於制國用廣儲蓄之後卽以興學爲本務而學之所以教則禮以節性教以興德政以防淫乃其大者則本之尊君親上而使人皆自範於禮義其教之而不帥者至於屏移而不齒以故父兄師友之所誥誡禮義廉恥之所漸摩人莫不強勉以自力於學至於大成而後已故其時成人有德小子有造觀雅詩所詠菁莪之樂育薪樗之作人如卷阿所歌有馮有翼有孝有德而無一之不備者噫何其盛也漢世去

古未遠其與計偕必好文學肅政教出入不悖所聞始詣太常受業不徒文章爾雅訓詞深厚也迨後世而教學之意寢微父師之所傳子弟之所習徒事咕畢以獵取祿位而已此士習不淳而風俗因之日薄者其以此也歟考蜀郡在秦時始置當漢景之末其地猶然僻陋自文翁爲守修起學宮蜀地學京師比齊魯焉是蜀在三代之時無學而蜀之有學蓋自文翁始也武帝建元六年益開犍爲郡縣十二首夔道次江陽富順故江陽治也斯時地當創闢學之建與學之未建歷世旣遠無由按籍而稽然考武帝之世令天下郡國皆立學校官則斯地之有學

也其來久矣邑自漢以後爲州爲監名旣數更學之興廢不一
觀舊志所載自晉唐迄明其人隱顯殊途皆有所傳以表見於
當世至明末罹張寇之害幾無噍類士之遠徙獲全者僅數十
人而已豈運丁其劫數已定而不可復挽歟抑降之自天人事
有以致之而然歟夫天道甚遠而人定可以勝天則所以正人
心而端學術者顧可一日不講歟學宮自甲申之亂傾圮無存
隆之捧檄而來也時以糗糧芻茭之供未遑建立經始於壬戌
之歲歷今三年次第落成余嘗考學之廢興關乎世之隆替昔
周衰學廢生徒分散朋友不復羣居詩是以有子衿之刺漢安
薄於文藝博士不講而學舍鞠爲園蔬今 國家值戢戈囊矢
之後 天子誕敷文教思返澆漓浮薄之習以進於敦龐淳
固之初天下之士亦旣靡然嚮風矣士幸生其世惟勉思學校
之所以爲教者以修倫紀以勵廉隅浸淫乎禮義之途沐浴乎
詩書之澤而不徒事乎咕畢以邀榮於當世則人事修而天變
自弭異日賢豪蔚起當必有卓然樹立者庶無負 國家建學
之旨而於古來教育人材之意有合也是則隆之所厚望也夫
故因學之成而爲之推本立學之大端以告學者而爲之記至
於董是役者凡屬有事不敢畧也例得備書

康熙四十四年修復兩廡

知縣滿雲鷓記我夫子祖述堯舜憲章文武植萬世綱常大法俾後世知有君臣父子夫婦昆弟朋友之道功蓋百王賢於堯舜遠矣其崇功報德疊相承也蜀自秦時開郡漢景之末其地猶僻自文翁作守修起學宮蜀地學於京師者比於齊魯焉是三代以後無學而蜀之有學自文翁始至漢武帝開犍爲之學次犍道江陽江陽卽富順也則學之由來冠乎蜀矣所以漢世蜀地人才隱顯互著垂諸史冊者代不乏人迨晉唐宋明以來辟雍泮宮以及都邑黨塾典禮綦重殿名大成亞聖十哲祠之

諸賢列兩廡而董朱周程諸大儒配享於尼山之廡春秋虔祀朔望必謁道何隆澤何遠耶稽茲學建於宋毀於明前任錢令重建正殿余叨宰茲邑謁登分獻之時睹兩廡鞠爲茂草從來有堂陞者必有廊宇爲左右翼讀唐羅昭諫句釋氏寶樓侵漢道家宮殿連雲豈有廟貌孤立而賢哲之靈爽瞻覲蒿萊守土者何以安乎爰與廣文董劉尉捐薄俸令闔邑紳士矩日拓地鳩工庀材建兩廡於東西各五間按列牌位於內一載落成青丹堊釁稍立規模庶幾睹洙泗之淵源於一室而私淑乎聖人之教者恍沐杏壇之休風也已又不禁思子輿子之言曰山徑

之蹊間介然用之而成路人病不求耳以此觀之前者之披荆
冒露今則棟宇櫺堦固知開之求之在乎人何有茅塞之足慮
哉今我 皇上誕敷文教加意宮牆始採闕里修樂繼
御製訓士碑文頒之黌廟其教育人才之意已遠軼乎漢唐宋
矣今江陽才藪士生其間沐浴鴻化類皆奮疾激昂以副右文
之典爲賡歌喜起盛事何讓漢唐之士專美哉至余之不才幼
叨鄉薦濫竽民社文翁雅化何敢妄幾亦不過景仰乎前人起
學之心深有望於後來之學者云爾

康熙四十八年知縣錢經紳修名宦祠鄉賢祠

錢經紳記宮牆何如地春秋得循典制茹澗溪一縷毛酌行潦
一勺水厠庭燎光被之餘依先師大聖末照禮崇物備祀事孔
虔非夙樹三不朽之鴻業 國家藉以用昭法勸者其孰能與
於斯昔先王之制祀也非必神之也蓋亦附之教焉祭於天地
示有尊也不肅則無以致敬祭於宗廟示廣孝也不肅則無以
教愛祭於有功烈者示報德也不肅則何以勸善後人於先賢
先儒而下置祠曰名宦曰鄉賢殆古先王示報德以勸善之遺
意也矧宦以名傳樂利長留百世遺愛永重千秋膺之者節度
中丞而下逮丞簿尉不惟其爵惟其人不以崇卑論也鄉以賢

名入社而可師可法聞風而頑廉懦立膺之者公孤休采而下
逮縫掖士不惟其爵惟其人不以顯晦論也君子曰此三代之
公直道之行也遐思文獻未湮載在志乘名宦某翁迄某公凡
幾位鄉賢某公迄某公凡幾位實蹟可稽生平可述不其班班
歟茲闕有間矣名宦載自本朝其功懋澤深被當時而流後世
者固耿耿在人耳目而不能忘豈前乎此者竟渺無其人歟蓋
文獻不足徵也若鄉賢則舊聞放佚故老云亡亦無有能述其
往事撫今感昔祇漠然徒見山高水深而已夫以凜凜其人羹
墻斯在方懸俎豆以俟咨謀士大夫賢者責也祠舊地圯康熙

二十年家給諫紹隆公實守是邦拮据橋門事艱工鉅僅恢廟
序二祠闕如今二十餘年紳來踵事相度舊址以經以營制具
物備牽贊日虔會邑人方疏功德請祀如禮公爲之前紳爲之
後敢云光美傳盛哉有事爲榮亦幸際矣則進邑人而告之曰
聖天子臨御纔四十八年祀事循明百神效職矧茲陪祀
固秩宗明賜哉仰副大廷法勸初心以對揚休命若也出而筮
仕當思忠在王國以永譽方州處而家修當思孝在庭幃以砥
磨鄉里化從教起報不遺賢鏗鏗鼓鐘靈爽式憑立德立功前
式具在尙其思之紳也敬與邦人合頌景行之章而貞諸石

教諭署在明倫堂左訓導未設衙署僦居民房

巡撫曾省吾儒學題名記夫聖王操世易化孰先乎教哉今之教其名猶古也而實乃大謬人才不相逮曷以也夫堯使契爲司徒教以人倫當其時一命官而風動人人胥君子矣是寧易致爾哉三代盛時國有學黨有庠州有序家有塾何在非教靡耑宦也孟子曰皆所以明人倫教之興也其此之繇乎漢承秦弊迨武帝時聽文翁講乃遍令郡國立學校官彼非近古時與固不聞官之所爲教者何如也唐宋而下余又何稱焉恭惟我太祖高皇帝御極之明年他務不遑首詔天下立學而命之官

其統之大誥勒之卧碑縣之教明榜文者詞靡一而意至隆茂若曰官於學者咸懷先聖賢之道開上知明中材訓下愚將歸本而澄源烏以居非禮之徒若曰爲師者宜體先聖賢之道竭忠以導愚蒙勤考課別善惡罔或惰厥職若曰官以教爲名務先聖賢格言是訓育成才以爲任用需其不能者誅意固莫可殫述矣至其設之科條則又禮樂射御書數之外無間焉嗚呼休哉詎殊命契之意而明之乎三代者哉業若教者或卑卑焉自視猶不謂重此何以云也將爲自暴自棄者所藉口乎抑苟利祿不啼號於饑寒已也夫古之人有四門博士而望隆山斗

富州縣志 卷十三
者矣有教授蘇湖而學明體用者矣不亦存乎人哉且委吏乘田孔子固嘗爲之然必曰會計當曰牛羊茁壯長矧夫賢才所隸而國家之禮亂關焉者乎爲弟子者習見夫教者之志若彼也率視若途之人然暴戾恣睢奚所不至何則師道不立雖有善人弗多矣廼教者恬焉學宮疇思所以自咎且勵遂使人倫之道泯滅從茲始又將焉往而明之其亦異乎聖祖設官意哉而我國家何所賴之也余所謂今之教其名猶古也而實乃大謬人才不相逮者在茲矣韓君彥清之董教事也方志聖賢之學爲余提調助而殷君陟張君文煥亦能相與以有成一日請

富州縣志 卷十三
余請曰官是學者多矣獨稱職若鮑公應朱公導者幸有志存焉餘皆湮沒而無聞後之人雖欲究其得失將安所指與乃今考自國初以迄茲者若干人願一以記之鐫諸石余曰可哉斯舉也視世之卑卑焉不自謂重者不侔矣顧余從祖雍亦嘗教於斯余烏得而辭諸於是徵古之所以爲教與我聖祖所以設官之意告之俾顧名而允蹈其實夫邑號多才夙先全蜀今又得良司教焉豈不益濟濟蒸蒸爲子盡孝爲臣盡忠以佐聖天子久道之化而直追古昔之隆哉余且卜司教者將永有詞於來世而同乎宇宙不朽矣茲石之與文夫何爲者哉姑與之記

富川縣志 卷十三
雍正六年知縣俞起運修補大成殿兩廡乾隆二十年知縣熊葵向修砌圍牆重建大成殿兩廡併砌月臺聖道規制增舊

知縣熊葵向記余以乾隆十八年癸酉冬來任富邑下車卽謁夫子廟見圍垣多缺椽棟欲頽階級臺墀存毀不一甲戌春捐養廉百餘鳩工修砌圍牆造木架覆以瓦甃坭粉丹黝旣成邑之紳士劉安貴郭育王椿王來一等謂余能更新大成殿願襄盛舉爰於丙子冬首捐百金集紳士於明倫堂均樂出力計算得千餘兩擇吉起工於丁丑仲春至本年十二月告竣殿之深廣仍其舊較前增高五尺神位概從新製并懸康熙二十五年

御書萬世師表雍正元年

御書生民未有乾隆三年

御書與天地參匾額於中堂金硃塗繪內外輝奕兩廡戟門以及月臺丹墀木石之營亦皆整飭是役也余從衆以倡其事是皆闔邑諸君子尙義急公之力居多富邑人文其由茲蔚起乎謹書之以俟後之君子

明倫堂舊在 聖廟後嘉慶九年改爲 崇聖祠另建明倫堂

於 聖廟左前爲奎星閣左爲教諭署後爲訓導署

御製卧碑在明倫堂左

御製訓飭士子文刊碑立明倫堂右

上諭碑文刊碑立明倫堂右康熙二十五年

御書萬世師表匾額雍正五年

御書生民未有匾額乾隆三年

御書與天地參匾額嘉慶四年

御書聖集大成匾額道光元年

御書聖協時中匾額俱敬謹刊奉

大成殿

至聖像石刻在崇聖祠後今廢改為木刻係吳道子筆

額設復設教諭一員訓導一員吏一名

學額中學十二名舊額八名康熙年間廩生汪琳倡首請增

四名為十二名廩膳生員二十名增廣生員二十名二年一

貢歲科額進文武新生各十二名撥府無定額遇 恩廣額

不為例

頒發書籍

上諭一部十本詩經一部二十本書經一部二十本性理一部五本

欽定學政全書一本春秋一部二十本新頒學政全書一部八本

御製訓飭士子文一本明史通鑑綱目一部四本明史一部一百零五本

鴈塔舊在明倫堂前宋乾道元年知監史全建教授李睨撰記

富川縣志 卷之三
明正統中知縣李真教諭李皓重立景泰中教諭王綸重立正
德中教諭董璧重立

國朝嘉慶七年署縣曾自柏教諭宋傑移至大成殿側

歷代科名仕宦忠孝節義匾嘉慶十七年教諭杜禮訓導杜源
琳奉學院趙佩湘文錄成八匾懸明倫堂左右壁

博文齋約禮齋俱在明倫堂左右今廢

題名榜在明倫堂兩壁今廢

號房天順中典史萬孔才成化中知縣李廷聰俱重修今廢
射圃在文廟東今廢

鯉門在明倫堂左學署之前今廢

育才坊叢桂坊俱成化末年知縣梁文建今廢

書院

柳溝書院在縣東北六十餘里宋李文淵建今廢

西湖書院在縣治西百餘步舊有李見讀易洞明嘉靖四年知
縣周夔於洞前建立書院中爲景賢堂後爲凌波樓兩傍爲講
堂洞上有滴露亭六年縣丞侯秩增修今廢

明縣丞侯秩記神龜山上負縣治臨西湖麓有隱士李見讀易
洞曠廢適五百載嘉靖乙酉前令周公遜始修復之仍拓旁地

富川縣志 卷十三
創室若干楹欲館授生徒廼祠名宦鄉賢以示從入之門匾曰
西湖書院崇先哲作後人以培治化視瑣瑣自營者遠矣但未
就而去余以丙戌冬來假息於此甚惜之明年春李大巡姚少
參二公行部至偕臨視之遂發檄購金以余董役事而陳令子
中亦尋至乃與節其所完補其所闕前功始畢豈勝蹟理不終
廢而興廢亦有期數歟雖然讀書之院百工之肆也進止則在
乎其人得其門而不升其堂不入其室皆自棄也矧文辭而已
乎作者意固有在也嗚呼又安知後日不以是爲博籩籩廬之
所也耶 邑人胡璧西湖書院詩湖光蕩漾湖水絲新向湖邊
作書屋波濤洶湧似文章景界深幽隔塵俗淡煙繞檻硯屏清
秀色映窻圖書橫一夜晦冥雷雨作拍天捲浪騰長鯨

國朝知縣劉上駟增修亦有記

景陽書院在治北城隍廟側邑令熊葵向因西湖書院地勢底
窪規模局促夏秋水漲漫下濕諸生居之多生病疾於乾隆
辛巳春捐俸倡修前建頭門三間講堂五間抱廳五間後堂五
間東西廂房二間東側廚房三間有詩賦碑記四座立於抱廳
之傍撥官木崖田地一處迴龍寺田地一處伏虎寺沙土一壩
程家寺淨明菴夏家灣滿公祠共七處陸續撥入義學三十九

年署縣楊掄撥下洞寺田地一處入義學

國朝知縣熊葵向建景陽書院自爲記

江陽書院卽景陽書院乾隆三十一年知縣官德重修書院於頭門懸額易景爲江撥玉皇觀田地二處入義學乾隆四十一年署知縣段玉裁增修學舍更名學易而繫之曰宋時薛李二先生皆深易學故顏之以爲來者楷式云爾撥海門寺田地一處入義學五十六年邑令潘邦和補修書院仍名江陽撥青皮灣田地一處入義學六十年撥騎龍菴田地一處入義學潘自爲記嘉慶十六年知縣張利貞捐修頭門補葺講堂及諸生書

室十七年勸捐膏火考取收錄內學正課六名每人每月膏火銀一兩副課六名每人每月膏火銀五錢外學與內學同訓導杜源琳爲之記諸記不具錄道光七年知縣宋廷楨纂修邑志所有學田並小學田地分列東南西北地名租穀土租一並編入以俟後之好義君子共襄厥志云

上東學田

楊家山 田地一股每年收租穀拾五石八斗

載糧二錢六分五厘

涂家寺 每年撥收租穀拾石

南極菴 每年撥收租穀叁石

藍家壩

文童張萬程捐銀壹千兩置買 每年收租穀貳拾石入小學

官木崖

土壹段每年收租錢五千貳百文

以上五處田土每年共收租穀肆拾捌石捌斗乾租錢五

千貳百文

下東學田

淨明菴

田地一股每年收租穀壹百叁拾伍石肆斗土一段
每年收乾租錢貳千文

中和寺

田地一股每年收租穀捌拾肆石

文昌宮

每年收租穀肆拾貳石入學田

東關義渡

每年收租穀肆拾貳石

大田邊

廩生蕭承錫捐銀肆千貳百兩置買入小學 田地一股每年收租穀壹百叁拾石
載糧貳兩五錢四分

古佛堂

田地一股每年收租穀貳拾陸石
載糧貳錢叁分伍釐
以上四處田土每年共收租穀叁百柒拾伍石肆斗

土租錢貳千文

上南學田

迴龍寺

田地一股每年收租穀貳拾石土貳段每年收租錢
拾千文

海門寺 每年撥收租穀叁石叁斗

大頭城 土一段每年收租錢柒千九百柒拾文

伏虎寺 沙土一段租穀貳拾叁石叁斗土租錢貳拾柒千玖

百柒拾文 載糧壹錢貳分

下南學田

青皮灣 田地一股每年收租穀貳拾伍石 載糧肆錢伍分

水口寺 每年撥收租穀貳石

白象寺 每年撥收租穀貳石

鍋鏟坡 田地一股每年收租穀伍石 係武廟載糧捌分捌釐

潘馬子 鎮溪口 科甲田地一股每年共收租穀肆拾捌石 載糧六錢柒分貳釐

貳毫

衙門口 西關外 膏火舖店二間每年收租銀伍拾兩錢叁拾千文

觀音山 膏火田地一股每年收租穀拾捌石 載糧四錢六分

以上九處田地舖店二間每年共收租穀壹百石店租銀

伍拾兩錢叁拾千文

上西學田

騎龍菴 田地一股每年收租穀拾肆石伍斗 載糧叁錢伍分

下洞寺 每年撥收租穀貳拾石 載糧叁錢伍分

以上二處田地每年共收租穀叁拾肆石伍斗

下西學田

古皇洞 每年撥收租穀叁石

下北學田

程家寺 田地一股每年收穀捌拾石

載糧貳兩陸錢柒分

夏家灣 田地一股每年收租穀貳拾陸石

載糧貳錢

玉皇廟 田地一股每年收租穀貳拾捌石土一段每年收租

錢拾伍千文

載糧叁錢肆分貳厘壹毫

以上三處田土每年共收租穀壹百叁拾肆石土租錢拾

伍千文

本城土租

第一山 田土一分每年收乾租錢拾千文

邵湖塘 土一段房屋二院每年收租錢拾壹千文

朝聖樓 舖店一間每年收佃租錢拾貳千文

正街上 舖房一間每年收佃租錢貳拾伍千文

以上本城四處熟土舖店每年共租錢伍拾捌千文

以上七路學田科甲膏火小學四項每年共收租穀柒百

壹拾玖石租錢壹百捌拾捌千壹百柒拾文

富順縣志卷十四
八路鄉場市鎮斗秤租錢撥錢壹百千文入小學

自流井東新書院及義學東新書院在自流井三里嘉慶十七年邑紳王循禮等創議將東新佛寺改建書院名東新書院講堂廡舍共計一十七間又經邑紳范儒相等捐置房屋田產共三處又將東嶽廟租錢撥入書院每年統收租息銀百兩有奇以爲山長脩脯之費嘉慶二十二年邑令張利貞另設義學在本場五皇殿延師訓蒙捐銀一百兩又督同邑紳朱近光等共捐銀八百兩有奇付殷實家收管生息每年除供蒙師脩脯外餘贏撥歸東新書院作生童每年膏火之費

富順縣志卷十四

祀典志

一邑之長民社是膺明德薦馨神人所憑煌煌祀典罔敢不承明禋昭格其香始升實輔民義匪但豆登百神受職居歆可徵志祀典第十四寺觀附焉

壇

南壇在西關外太平橋之南明洪武初鍾鉉創建各壇墀雍正二年刊圖頒行壘石爲壇高二尺一寸縱橫各一丈五尺四出陛各三級繚以短垣環蔭松樹四面爲門飾以丹堊壇設石主二